



Notat

Til:

Kopi til:

Saksbehandlar: Rådmann/Solrun Hauglum
Vår referanse: 17/899 - 18/4020 / FE - 230
Dato: 22.05.2018

Emne: Evaluering av interkommunal legevakt Voss og omegn

Bakgrunn.

Kommunestyret fatta 27.06.2016 vedtak om at Vaksdal kommune skulle inngå vertskommunesamarbeid med Voss kommune om interkommunal legevakt (IKL). Den nye legevaktordninga skulle evaluerast når den hadde vore i drift i eit år. (Sak 61/2016)

I følgje vertskommuneavtalen skal Voss interkommunale legevakt dekkja det ansvaret kommunane har etter lov av 24. juni 2011 nr. 30 om helse- og omsorgstenester § 3-2 med tilhøyrande føresegner i forskrift av 20.03.2015 nr. 231, Akutforskrifta. Samarbeidet er eit administrativt vertskommunesamarbeid med heimel i Kommuneleva § 28-1 a. Samarbeidsavtalen er inngått med heimel i Kommuneleva § 28-1 b.

Gjennomføring av evalueringa.

Kommuneoverlege Ole M. Thorseth og kommunalsjef Solrun Hauglum har hatt ansvar for evalueringa. Ved evaluering har me teke utgangspunkt i gjeldande lovverk med forskrifter og inngått vertskommuneavtale. Det er etterspurt data frå vertskommunen, og «Årsrapport for Voss og omegn interkommunale legevakt 2017» er nytta (sjå vedlegg). Legar i vaktordninga og aktuelle leiarar/tilsette i helse og omsorg i Vaksdal kommune er spurde om erfaringar med legevakta, deriblant attendemeldingar frå innbyggjarar og tilsette. Det er ikkje gjennomført brukarundersøking.

Drift i relasjon til lovverk, forskrift og vertskommuneavtale.

- Føremål og rettsleg grunnlag er skildra i vertskommuneavtalen og har vorte godt ivareteke første driftsår.
- Vertskommuneavtalen definerar klart Voss sitt ansvar som vertskommune. Mynde og pliktar for drift og personell har vorte ivareteke første driftsår.
- Voss IKL leverer forsvarleg helsehjelp, er organisert etter avtalen og tek i vare lov, forskrift og anna regelverk.
- Naudsynte støttefunksjonar står til rådvelde, og Voss IKL har eigen legevaktbil.
- Informasjonsbrosjyre er utarbeida og sendt innbyggjarane i dei aktuelle kommunane.
- Ansvar for fagleg standard og fritak for legar p.g.a. alder eller sjukdom vert handsama etter avtalen.
- Det vart første driftsår kalla inn til samarbeidsmøte i tråd med avtale.

- Vaksdal kommune er ikkje nøgd med budsjettprosess og kostnadsnivå for 2018. Dette vert følgt opp på rådmannsnivå.

Erfaringar i Vaksdal kommune.

- Den generelle attendemeldinga frå innbyggjarane er gode etter eit års drift.
- Det er ikkje kjennskap til at det har vore avvik knytt til Voss IKL frå innbyggjarar eller tilsette i Vaksdal kommune. Etter det me kjenner til, har to andre kommunar hatt mindre alvorlege avvik knytt til kommunikasjon og tilgjengelegheit.
- Vaksdal kommune har ansvar for sin del av vaktene til legane, og dette har fungert godt. Vaktene har vorte dekkja med eigne legar, faste vikarar og andre legar i legevaktordninga.
- Legane si vaktbelasting er akseptabel.
- Etter oppstart av interkommunal legevakt har fastlegane i kommunen hatt god tilgjengelegheit og opningstid i tråd med forskrift. Vaksdal kommune har eiga legevakt frå 08.00 – 16.00 på kvardagar og eigen legevaktbil.
- Legane i kommunen er nøgd med Voss IKL. Fagmiljøet er styrka, to legar er på vakt samstundes, og ein får assistanse frå sjukepleiar i mottak.
- Auka tryggleik for legar på vakt er ei stor føremon.

Forbetringsområde.

- Informasjon på eigne nettsider ser ikkje ut til å vera utarbeida.
- Håndbok og prosedyrar er under utarbeiding, men er ikkje ferdige.
- Journalnotat på legevakt skal sendast som epikrise eller e-melding til fastlege eller kommunale institusjonar. Her er det forbettringspotensiale, og legevaktsjef har teke dette opp med legane.
- Budsjettprosessen i 2017 for budsjettåret 2018 burde ha vore betre. Kommunane burde ha vore meir inkludert i prosessen. Framlegg til stor budsjettauke etter første driftsår var uheldig, og manglande dialog med samarbeidskommunane vert opplevd som vanskeleg.
- Økonomistyring. Voss IKL har eit meirforbruk på om lag 2 millionar første driftsår.
- Deltaking i Voss IKL har medført betydeleg kostnadsauke for Vaksdal kommune.

Oppsummering.

Voss IKL er drifta i tråd med lover, forskrifter og vertskommuneavtalen. Den generelle attendemeldinga frå innbyggjarar, tilsette og legar i Vaksdal kommune er at dei er nøgde med legevakta. Legane har fått ein betre og tryggare arbeidssituasjon med mogelegheit for kompetanseheving og å konferera med andre legar. Legetenesta og legevakta i eigen kommune fungerer godt med kort ventetid og god kapasitet.

Deltaking i Voss IKL gjer Vaksdal kommune langt mindre sårbar i f.t. legedekning og legevaktordning som sikrar innbyggjarane sitt behov for øyeblikkeleg hjelp. Det gjer oss i stand til å drifta legevakt etter akuttforskrifta og auka krav til kompetanse og kapasitet. Styrka fagmiljø og tryggare arbeidsforhold vil også virka positivt for rekruttering.

Misnøye med legevaktordninga er knytt til økonomi, budsjettprosess og kostnadsauke for Vaksdal kommune sin del.

Legevaktsjef for Voss IKL har meldt frå om at det skal utførast evaluering av den interkommunale legevakta, og dei deltakande kommunane er innkalla til møte angående evaluering i juni 2018.